

يا محمد حافظ عليها ربت الوجه المليح  
أقبلت تهاني حلاها يختصر كل الملاح

لا تلومون الحروف إن ما وفتها بالمديح  
واعذروا البدر إن تعثر من على الغيمة وطاح

\*\*\*\*\*

قولوا هذا الزين كلة قولوا للورد استريح  
ما نته برقة حلاها أو شذى العطر إلي فاح

قولوا هذا الزين كله وإلا قولوا بالفصيح  
ما نته برقة حلاها آية السحر المباح

\*\*\*\*\*

يا مساء الفرحة اللي تبعد الهم وتزيح  
بحضور اللي لقاهها يولج القلب انشراح

الحشيمة اللي حكيها كالندى لما يطيح  
من على النرجس وتنعش قطرته روح الصباح

\*\*\*\*\*

في فرح بنت نسبها يشبهه النور الصريح  
بنت صالح اللي صداها في سما الأمجاد لاح

يا عسى يسعدها ربي خالق الكون الفسيح  
في حمى شيخ فؤاده مثل ماء العذب القراح

\*\*\*\*\*

من هو اللي في سماته يرتقي ويحلى المديح  
الكريم الشهم اللي طلته هيبه وسماح

من هو اللي نال قلبه ربت الوجه المليح  
الأصيلة اللي حلاها يختصر كل الملاح

\*\*\*\*\*

يا محمد حافظ عليها ربة الوجه المليح  
أقبلت تهاني حلاها يختصر كل الملاح

لا تلومون الحروف إن ما وفتها بالمديح  
واعذروا البدر إن تعثر من على الغيمة وطاح